

Tafite

I Tafite Dyisas Krayst ku Dyan

Kafaglabat i libru sulat Dyan gablà di tafite Dyisas Krayst di kenen

Na libru ani nun gumahalan di dademe libru di Tnalù Dwata, du dini gugmadè dad to gablà di gusen i banwe, na i katbù i falami langit na falami tanà.

Na Dyan satu to gal dek Dyisas smulat ani di kbilangguan ditù di Fungul Fatmos mdà di katdoan gablà ku Dyisas Krayst. Na di taksulat Dyan ani là mlo na mati. Na di klon di Fatmos, nun kanteenan fite Dyisas di kenen gablà ku tan i mkel kadang di fulé duh.

Snulatan dad to faglut du tangalan nawala, du di bang atù nun urdin mdà di gumdatah di Roma ku simto faglut di ku Dyisas Krayst fanlayam kenen. Na too dee tamati mdà di kaflayam kel di dale mdà di kafaglutla di ku Dyisas.

Tulen Dyan i dad fgadè na fite Dyisas kenen gablà di fan mkel di tah tanà di kasfuléan, na gablà di kdadong gusen i banwe. Na too dee dad tnikeng gfitte di kenen, na kdee nun mngalam gumtatekan. Na dini gumite fa gablà di banwe Dwata di langit na i kafye bawehan. Na too mbangal dini, i ulu di dad busaw dnagit ku Satanas, tagfisan Dyisas Krayst, na nun duh fanlayam Dyisas kenen na kdee mlalò kenen, du bat ale di lanaw lifoh. Na Dyisas Krayst mbaling Ulu di kdee ulu na Amu di kdee amu landè gusen.

1 ¹Ani libru gusmulat i tafite Dyisas Krayst di dad to salig Dwata. Funa fite Dwata kdee ani di ku Dyisas, du fye fgadean di dad to saligan ku tan i fan mkel. Na agu Dyan satu saligan fangadè Dyisas Krayst fagu di kdekan satu kasaliganan. ²Na i kdee tafite di deg toogu tulen. I kdee tulengu ani slame tnalù Dwata na i kaglut tafgadè Dyisas Krayst di deg.

³Too nun kafye i to masa i libru ani di kaklinge i dad to. Na ku simto flinge na mlalò i tagsulat dini nun kafyen, du tamdadong i kagdohò i tafgadè Dwata ani.

I sulat di fitu lumbuk i dad to faglut

^{4,5}Na agu Dyan smulat i sulat ani di fitu lumbuk i dad to faglut glam di bong banwe Asya. Na kayègu Dwata, i tagnè mdà di kagatbuan, kel

ani na kel di atuan landè gusenán, na i Mtiu Tulus, na Dyisas Krayst mlé gamu kafye na ktanak nawa. Na i Tulus Dwata, déén kenen di muna Dwata, na nun fitu kfagu kfiten i ktulusan. Na too gsalig i kdee man Dyisas Krayst na kenen i muna mték mdà di fati na magot i kdee dad hari dini di tah tanà ani.

Na toon ito kanbong nawa na tafalwaan ito mdà di dad salaito fagu di kfalohan litean di fatin di krus. ⁶Na ani tanimoan ito dad to fakay magin kenen di kagotan, na fbalingan ito dad bà di Maito Dwata. Na taman too ito dmayen i kdatahan du landè gusen i kagotan. Amén.

⁷Neyeyu! Samfulê kenen kadang satu duh gagin i dad labun,
na kdee dad to kadang mite kenen,
balù i dad to mati kenen di muna fa mite kenen,
na i kdee sahal lumbuk i dad to mlanu kadang, du kenen kadang mukum na mlayam dale.

Too sa gdohò ani. Amén.

⁸Na man Amuito Dwata, “Agu Too Mtulus, agu gutambù i kdee, na agu alò fakay mnge i kdee. Na agu tagnè mdà di kagatbuan kel ani, na kel di atuan landè gusengu.” Ani man Dwata.

Fite Dyisas Krayst i kton di ku Dyan

⁹Na agu Dyan, satu flanekeyu faglut di ku Dyisas, na fagu di ksatuito di kenen gakuf agu di gamu di kaflayam, na di kagotan, na di ktayud. Fanlayamla agu du fnèla agu ditù di satu fungul dnagit Fatmos, du tamdò agu Tnalù Dwata na du tulengu i kaglut gablà ku Dyisas. ¹⁰Na di duh Linggu i duh Dwata, tanebe agu Tulus Dwata na nun lingegu bong talù di kagolgu gambet i uni twang, bay i manan too gamal. ¹¹Na ani manan, “Sulatam i kdee teenam, na febem kadang di fitu lumbuk i dad to faglut di dad banwe Ifisus, Smirna, Firgamun, Tiatira, Sardis, Filadélfyá, na di Lawdisya.”

¹²Na kafnge én, falê agu du neyegu ku simto i talù di deg. Na di kfalêgu teengu fitu gufkah i dad salò slame blawen. ¹³Na di bleng i dad gufkah salò nun tadag déén na kafbaweh to. Na i klawehan gambet nsif tahà na nun blawen glabéd di kfen. ¹⁴Na i wakan slame too bukay. Na matan too gamban gambet dinè i lifoh. ¹⁵Na i dad blian mneng gambet kneng i tabaga tnunal di luben. Na i taluan gambet uni malbang fikong. ¹⁶Na di kmalan gsen di kwanan nagotan fitu blatik. Na lamwà di baan sundang sbalà gban. Na bawehan too mneng gambet kneng i duh ku taltu i duh.

¹⁷Di takitegu kenen fagbunal agu di blian gambet i to tamati. Kabay agotan deg i kmalan gsen di kwananan, na manan, “Nang ge likò. Agu sa gutambù i kdee na mnge i kdee. ¹⁸Deg sa mto. Balù tafnatila agu, bay neyem, talêman agu mto na landè gusen i nawagu. Na agu magot nawa

i dad to, na nun bong glalgu magot i fati na Hadis i gumnè i dad layef i dad to tamati. ¹⁹Taman sulatam i kdee fitegu di ge, i tamkel ani, na lêman i kdee mkel kadang. ²⁰Na ani gumtatek i fitu blatik tateenam di kmalgu gsen di kwanan, na i fitu gufkah i salò. Na i fitu blatik dunan dad kasaligan Dwata gal mifat i fitu lumbuk dad to faglut. Na i fitu gufkah i salò dunan i fitu lumbuk dad faglut di dad banwe tadnagitgu gine.” Ani man Dyisas di deg.

I fgaðè Dyisas di dad to faglut di banwe Ifisus

2 ¹Na lêman man Dyisas di deg, “Ani sulatam di kasaligan Dwata mifat i dad faglut di banwe Ifisus. Manam di dad to faglut, ‘Nun man i to magot i fitu blatik di kmalan gsen di kwanan na magu di bleng i fitu gufkah i salò. ²Na ani sa i manan di gamu. Gadègu i kdee nimòyu, na i kalgadyu mimò di deg na i ktayudyu di dad kaflayam. Na gadègu là gamu faloh i dad to sasè makuf di gamu, i dad to flingu dek ale Dyisas. Tatooyu ale neye na tagadèyu tmulen ale kéng du ise ale dad to dekan. ³Na gadègu gamtayud gamu di dee bung kaflayam mdà di kafaglutuyu di deg, na là mlungay i nawayu mimò fye. ⁴Kabay nun làgu kayè di gamu. Talà gamu mbong nawa deg na dad demeyu faglut gambet di muna di katbù i kafaglutuyu di deg. ⁵Fandamyu i muna kakdoyu deg, na nsalyu i gukulangyu, na samfulè gamu di muna nimòyu. Du ku là gamu msal tati agu salu ditù di gamu na nwègu di gamu i gufkah i salòyu. ⁶Kabay, ani fa i fye teengu di gamu, dunan i knangyu dad nimò i dad to Nikolas salngad i knanggu.

⁷“Ku nun klingeyu, too gamu flinge i gman Tulus Dwata di gamu dad to faglut. Na i dad to gamfisan i dad sasè mkel di dale di klalòla deg, fankaangu ale kadang i bunge kayu mlé nawa landè sen. Na déén gumnè i kayu ani di banwe Dwata di langit.’ ” Ani man Dyisas di dad faglut di banwe Ifisus.

I fgaðè Dyisas di dad to faglut di Smirna

⁸Na ani man Dyisas di deg, “Ani sulatam di kasaligan Dwata mifat i dad faglut di banwe Smirna. Manam di dad to faglut, ‘Nun man i to gutambù i kdee na mnge i kdee, i tamati, bay tamté. ⁹Na ani sa i manan di gamu. Gadègu i bong kaflayamyu na klandèyu. Kabay i kaglutuan too bong knunyu mdà di Dwata. Na gadègu gablà di ksasè kastulen i dad to Dyu gablà di gamu. Balù manla too ale glut Dyu, bay kaglutuan, Satanas mfun dale. ¹⁰Nang gamu likò i dad kaflayam fan kel di gamu. Fanlingeyu agu. Ani nimò Satanas, fbilanguan i dademe di gamu, du tnilewan i kafaglutuyu sfalò butang klon. Ani mangu di gamu, nangyu tngak i kafaglutuyu balù fnatila gamu. Du ku làyu tngak i kafaglutuyu di deg, balù kel di fati, banléta gamu nawa landè sen.

11 “Ku nun klingeyu, too gamu flinge i gman Tulus Dwata di gamu dad to faglut. Na i dad to gamfisan i dad sasè mkel di dale di klalòla deg, là ale gmaslok i galwe fati, dunan là ale gagin di kaflayam landè sen.’” Ani man Dyisas di dad faglut di banwe Smirna.

I fgaðè Dyisas di dad faglut to di banwe Firgamun

12 Na ani man Dyisas di deg, “Ani sulatam di kasaligan Dwata mifat i dad faglut di banwe Firgamun. Manam di dad to faglut, ‘Nun man i to nun sundang sbalà gban. 13 Na ani sa i manan gamu. Gadègu gablà di banwe gumnèyu, du nagot Satanas banweyu. Kabay knean, too mabtas di gamu i klalòyu deg na làyu tngak i kafaglutyu balù di kfatila ku Antifas di blengyu. Too gsalig Antifas tmulen gablà di deg. 14 Kabay nun làgu kayè di gamu, dunan nun di gamu mlalò i tdò Balaam. Balaam ani tamdò ku Balak di muna, na i tdoan kenen i kiboan fagsalà i dad to Israèl fagu di kakaanla i dsù blé di dad ise glut dwata, na fagu di kimòla sasè knayè i lawehla. 15 Na nun satu làgu kayè di gamu, dunan nun di gamu mlalò i tdò Nikolas.

16 “Taman nsalyu i dad salàyu na samfulè gamu di deg. Du ku là gamu msal na là mlo salu agu déén di gamu na sanfatigu i dad to là msal fagu di sundang lamwà di bàgu.

17 “Ku nun klingeyu, too gamu flinge i gman Tulus Dwata di gamu dad faglut. Na i dad to gamfisan i dad sasè mkel di dale di klalòla deg, banlégu ale i knaan dnagit mana mdà di langit, i tagbuni ditù, na banlégu i kat satu dale i bukay batu. Na déén di batu i gusmulat i falami dagit, bay alò i to gamdawat i batu ani gmadè i dagit gsulat déén.’” Ani man Dyisas di dad to faglut di banwe Firgamun.

I fgaðè Dyisas di dad to faglut di banwe Tiatira

18 Na ani man Dyisas di deg, “Ani sulatam di kasaligan Dwata mifat i dad to faglut di banwe Tiatira. Manam di dad to faglut, ‘Nun man i Tingà Dwata, dunan i to nun dad matan gamban gambet dinè i lifoh, na i dad blian mneng gambet kneng tabaga tnunal di luben. 19 Na ani sa i manan gamu. Gadègu gablà di kdee dad nimòyu, i kaddoyu i demeyu to, na i kafaglutyu na i kimòyu di deg, na i ktayudyu di dad kaflayam. Na gadègu matnù i kafye nimòyu. 20 Kabay nun làgu kayè di gamu, dunan i kfalohyu i libun dnagit ku Dyésibél tamdò dad saliggu. Manan kenen satu tugad Dwata, bay ise. Fangawan i dad saliggu, du i tdoan fakay kun ku nimòla sasè knayè i lawehla na kmaan i knaan dsù di dad ise glut dwata. 21 Na tabanlégu kenen i bang msal di sasè nimoan, bay laan mayè. 22 Taman toogu fanlayam i libun ani, na gamu i magin kenen mimò i sasè knayè i lawehyu du banlégu gamu i too sasè tduk. Ani sa nimògu ku là gamu msal na kmagol i sasè nimòyu. 23 Na fafatigu i dad mlalò kenen, du fye

gadè i kdee dad to faglut di sahal banwe agu i gmadè ku tan i mnè di fandam na nawa i dad to, na agu kadang malas i dad mgimòla balù fye demen sasè.

24 “ ‘Kabay nun dademe di gamu di Tiatira là mlalò i dad sasè tdò ani, dunan làyu dnawat i dagit dademe kun dad mngalam tdò mdà di ku Satanas. Na mangu di gamu, landè dademe fnigu di gamu. 25 Alògu fni, tooyu fkah di nawayu i kaglut tafnaglutyu kel di kasfulègu.

26 “ ‘Na i dad to gamfisan i dad sasè mkel di dale di klalòla deg na fadlug di kimòla knayègu kel di gusenana, ale i dad to gumlégu glal magot i dad to di dad sahal banwe, 27 salngad glal blé Màgu deg, du manan, “Falmola kadang i dad dmuen dale fagu di kgal i kagotla, gambet kalmo i kulang tanà tudaam di tanà.”^a

28 Na nun too fye blégu dale gambet i blatik gal mneng smitong i mwal.

29 “ ‘Ku nun klingeyu, flinge gamu i gman Tulus Dwata di gamu dad to faglut.’ ” Ani man Dyisas di dad faglut di banwe Tiatira.

I fgaðè Dyisas di dad to faglut di banwe Sardis

3 1 Na ani man Dyisas di deg, “Ani sulatam di kasaligan Dwata mifat i dad faglut di banwe Sardis. Manam di dad to faglut, ‘Nun man i to too mtulus na galan fite i ktulusan di fitu kfagu na magot i fitu blatik. Na ani sa i manan di gamu. Gadègu i kdee dad nimòyu. I gal man i dad to nun falami nawayu, bay i kaglutan gambet gamu mati. 2 Mukat gamu nan, na tangalyu i kafaglutyu du fye là fles mati. Hae, du là sikof i dad nimòyu di kite Màgu Dwata. 3 Taman fandamyu i gatdò di gamu talingeyu na tadnawatyu, na tooyu fkah di nawayu. Knagolyu i dad sasè nimòyu, du ku là gamu flinge i gmangu ani, salu agu di gamu gambet i to tmaku, du làyu gadè i kakelgu, na fanlayamta gamu.

4 “ ‘Kabay gadègu nun dademe di gamu di Sardis là fagsik i klawehla, du là ale magin di sasè nimò i dad to én, taman gablà ale lamsak i bukay klaweh na magin deg. 5 Na i dad to gamfisan i dad sasè mkel di dale di klalòla deg, ale kadang lamsak i klaweh bukay. Na làgu nifu i dagitla di libru gugsulat dagit i dad to gamdawat nawa landè sen, bay nfungu ale kadang di muna i Màgu na i dad kasaliganan. 6 Ku nun klingeyu, flinge gamu i gman Tulus Dwata di dad to faglut.’ ” Ani man Dyisas di dad to faglut di banwe Sardis.

I fgaðè Dyisas di dad to faglut di banwe Filadélfya

7 Na lêman man Dyisas di deg, “Ani sulatam di kasaligan Dwata mifat i dad to faglut di banwe Filadélfya. Manam di dad to faglut, ‘Nun man i to landè salà, na too gsalig, na too nun glal di kagotan gambet i kagot Hari

^a 2:27 Salmo 2:9

Dabid, hae, du ku lanwan i takab, du fye fafusukan i to di kagotan, landè to gmagan tmakab dun. Kabay ku tnakaban landè gmagan lamwa dun.

⁸“Na ani sa i manan di gamu. Gadègu i nimòyu. Gadègu là dee gamu faglut, bay knean tafkahyu i tnalùgu di nawayu na là gamu kmagol deg. Taman lanwagu gamu i takab di kagotgu, na landè to gmagan tmakab dun. ⁹Fanlingeyu agu. Ku simto di dad to Dyu nfun Satanas flingu na ale glut Dyu, bay tmulen ale kèng, ani kibògu dale. Fdanàgu ale kadang di gamu, du fye gadèla gamu i kanbonggu nawa. ¹⁰Hae, du nimenyu i tdògu gamu gablà di ktayud di dad kaflayam kel di gamu, kanlunggu gamu du fye làyu gnagu i kaflayam fan kel di klamang banwe, du tnilewgu i kdee dad to di tah tanà. ¹¹I kasfulègu tamdadong. Na du tamdadong tooyu fkah di nawayu i kaglut fnaglutyu, du fye landè fakay mwè di gamu i untungyu tatagà Dwata gamu.

¹²“Na i dad to gamfisan i dad sasè mkel di dale di klalòla deg, fbalinggu ale mdatah déén di gumnè Màgu Dwata na mnè ale déén landè gusenán. Na sulatgu di dale i dagit Màgu Dwata, na dagit i banwe Màgu Dwata, dunan falami Dyérusalém i fdanà fdu di langit mdà di Màgu Dwata. Na sulatgu di dale i falami dagitgu.

¹³“Ku nun klingeyu, flinge gamu i gman Tulus Dwata di gamu dad to faglut.’” Ani man Dyisas di dad to faglut di banwe Filadélfya.

I fgadè Dyisas di dad to faglut di banwe Lawdisya

¹⁴Na ani man Dyisas di deg, “Ani sulatam di kasaligan Dwata mifat i dad faglut di banwe Lawdisya. Manam di dad to faglut, ‘Nun man i to too gsalig du kdee manan slame glut, na kenen i gumdà i kdee dad tanimò Dwata. ¹⁵Na ani sa manan di gamu. Gadègu i nimòyu. Gadègu là tno na là minit i kafaglutyu di deg. Too fye moon ku minit i nawayu di deg, bay ku là, fye ku tno, du là agu mayè sa ku alò mduf i init i kafaglutyu di deg. ¹⁶Na taman du alò mduf i kafaglutyu di deg, laan tno na laan minit, fangu gamu lwà. ¹⁷Na galyu man, nun bong knunyu, na landè sa gukulangyu, bay làyu gadè i kaglután, too sasè i kagkahyu, na magakdo gamu, du mbaling gamu dad to landè, na butè i fandamyu, na sadi gamu flaweh.

¹⁸“Taman ani fanngeweta gamu, di deg gumwèyu too glut blawen i gagu di lifoh, du fye nun bong knunyu. Na di deg gumwèyu bukay klaweh du lsakyu, du fye landè kyàyu di kaflawehyu. Na lêman di deg gumwèyu bulung i matayu, du fye mgulê i kbutèyu na baling gamu too mite. ¹⁹Nngakgu na bnadasgu i kdee dad to kanbonggu nawa, du fye matdò. Taman tooyu finit i kafaglutyu, na knagolyu i sasè nimòyu.

²⁰“Tooyu agu fanlinge. Déén agu di bà i gufusuk i gumnèyu na mbal agu myak. Na ku nun mlinge na tmimel i kbalgu, myak agu di gumnean, na song gami kmaan. ²¹Na i dad to gamfisan i dad sasè mkel di dale di

klalòla deg banlégu ale kadang glal sudeng di safédgu du magot kdee salngad di kafsudeng i Màngu deg di safédan di kfisangu i kdee dad sasè mkel di deg.

22 “ ‘Ku nun klingeyu flinge gamu i gman Tulus Dwata di dad to faglut.’ ” Ani man Dyisas di dad to faglut di banwe Lawdisya.

I gusudeng gumdatah di langit

4 ¹Kafnge én, nun lêman fite di deg. Na di keyegu teengu satu takab malwa ditù di langit, na lingegu i muna talù di deg, i taluan gambet uni twang tamlo di deg, manan, “Salu ge dini, du fiteta ge i dad fan kel.”

²Na di kagmanan ani, nebe agu Tulus Dwata, na déén di munagu teengu satu gusudeng i gumdatah na nun sudeng déén. ³Na i baweh i sudeng déén mneng, gambet kneng i dad mabtas batu dnagit dyasfér na kornalina, na glibut i gusudeng nun lawélawé, salngad batak i satu batu dnagit ésméralda. ⁴Na nun lwe falò fat dademe gusudeng glibut di gusudeng i gumdatah, na teengu lwe falò fat ulu di dad to faglut sudeng déén. Na kdeela lamsak dad bukay klaweh, na kat satu dale nun kyangen blawen di ulun. ⁵Na mdà di gusudeng i gumdatah nun silà na dad uni kilet. Na nun fitu salò dminè di muna i gusudeng i gumdatah. Na i fitu salò ani dunan fitu kfagu kfite ktulus i Tulus Dwata. ⁶Na di muna i gusudeng ani nun kafbaweh mahin too mtiu gambet i sfihu.

Na teengu fat gambet baweh lmanaf tadag di gutngà, glibut di gusudeng i gumdatah, na mto ale na slame mata i lawehla di kfe na di kagol. ⁷Na satu di dale gambet kbaweh i labè lmanaf dnagit liyun, i galwen gambet kbaweh i nati baka, i gatlun gambet kbaweh i to, na i gfatam gambet kbaweh i bong kablak mayeng. ⁸Na kat satu dale nun nam fafakla na lawehla slame mata di lwà na di lam. Na mlingag ale tayud i butang na mduh. Na man i lingagla ani,

“Landè salaan, landè salaan,
landè salà Amuito Dwata Too Mtulus,
i tagnè mdà di kagatbuan kel ani,
na kel di landè sen.”

⁹Na i fat gambet lmanaf ani dmayen, mafè, na mlé ale bong fye di gumdatah sudeng déén, i mto kel di landè sen. ¹⁰Na di kat kimòla ani, i lwe falò fat dad ulu di dad to faglut, lkuad di muna i gumdatah sudeng di gusudeng. Na nwèla i kyangen blawen di ulula na fkahla di munan, du mangamfù ale di kenen, i mto kel di landè sen. Na kdeela mlingag, manla,

¹¹ “Amumi Dwata, ge too gablà
dmawat i kdayen, kafè, na glal,
du ge tamimò i kalbong kdee,
na mdà di knayeam i kdee tamgimò.”

Ani lingag i dad lwe falò fat ulu.

I sulat maglulun na i Tingà Bilibili

5 ¹Na kafnge én, teengu i sulat maglulun di kmal gsen di kwanan i sudeng di gusudeng i gumdatah. Nun gsulat di laman na di lwaan, na nun fitu fadkatan. ²Na teengu i satu kasaligan mtulus. Na toon falbong i taluan, manan, “Simto gablà lamket dad fadkat na mbel sulat ani?” ³Na mngabal ale ku nun teenla ku simto gablà. Kabay landè teenla di kabal i langit ku demen di tah tanà ku demen di dungan i tanà gablà mbel i sulat ani na masa di laman. ⁴Mdà ani nun bong klidù i nawagu na too agu mngel du landè sa teenla i gablà lamket i fadkat di sulat ani na masa di laman. ⁵Kafnge én, nun satu di dad ulu i dad to faglut talù di deg, manan, “Nang ge mngel. Neyem. I dnagit Liyun mdà di bel Dyuda, tagamfisan i dad dmuen kenen, dunan Dyisas Krayst i bel Harì Dabid. Kenen sa i gablà lamket i fitu fadkat na mbel i sulat ani.”

⁶Kafnge én, teengu i Tingà Bilibili tadag di gutngà i gusudeng i gumdatah na i fat gambet baweh lmanaf na dad ulu i dad to faglut. Na Tingà Bilibili ani kbawehan tagagu di fati. Na nun fitu sungketan na fitu i matan, dunan Tulus Dwata i dekan ditù di klamang banwe, na nun fitu kfagu fiten i ktulusan. ⁷Na fdadong i Tingà Bilibili di gusudeng i gumdatah na nwean i sulat maglulun mdà di kmalan gsen di kwanan. ⁸Na di kagwean i sulat ani, i fat gambet lmanaf na lwe falò fat ulu lkuad di muna i Tingà Bilibili, du mangamfù ale di kenen. Na kat satu di dale magot satu agaf gambet i fuglung dnagit arfa. Na nun nagotla tukung blawen fnò falbuk too fye bun, dunan dad dasal i dad to nfun Dwata. ⁹Na mlingag ale i falami lingag, manla,

“Too ge gablà mwè i sulat maglulun,
na lamket i dad fadkatan,
du ge sa i tafnatila,
na liteam i bayadam dad to nfun Dwata,
dad to mdà di kdee sahal bung to,
mdà di kdee sahal talù,
na mdà di kdee sahal banwe.

¹⁰Na tanimoam ale dad to magin ge di kagotam,
na fbalingam ale dad bà di Dwatami,
na ale kadang magot i dad banwe di tah tanà.”

¹¹Kafnge én, lêman agu meye na lingegu i talù bong dee libu kasaligan, là gse ku file libu i kdeela. Tadag ale glibut di gusudeng i gumdatah na i fat gambet lmanaf, na i lwe falò fat ulu di dad to faglut. ¹²Na falbongla i klingagla, manla,

“I Tingà Bilibili tafnati, too kenen gablà dmawat i kdayen,
du kenen i nun glal, knun, kfulung, na ktulus,
taman gablà kenen dmawat afè, kfangamfù, na kdayen.”

¹³Na kafnge én, lingegu i talù i kdee mnè di langit, di tah tanà, di dungan i tanà, na di lam i mahin. Na sdulè ale mlingag, manla,

“I sudeng di gusudeng i gumdatah, na i Tingà Bilibili, tooito dnayen, tooito nafè, na tooito fdatah kel di landè sen, du too mtulus.”

¹⁴Na i fat gambet lmanaf gagin i kdee én, manla, “Too glut ani. Amén.” Na i lwe falò fat ulu di dad to faglut lkuad, du mangamfù ale.

Tingà Bilibili lamket i fitu fadkat

6 ¹Na kafnge én, teengu i Tingà Bilibili na lanketan i tnanin di fitu fadkat di sulat maglulun. Na di kalketan i fadkat lingegu talù i satu di fat gambet lmanaf, na gambet uni kilet, na manan, “Fafal ge, neyem ani.” ²Na di keyegu teengu i satu kudà bukey. Na i to smakay i kudà ani magot i bohòl, na banlé kenen kyangen blawen du ilè kenen gmagan misan. Na mdà kenen du natun i kdee dmuen kenen.

³Kafnge én, lanket i Tingà Bilibili i galwe fadkat, na lingegu talù i galwe di fat gambet lmanaf, manan, “Fafal ge, neyem ani.” ⁴Na nun lamwà fulè kudà. Banlé kenen glal mwè i ktanak nawa di dad to di tah tanà, du fye gadlug i kasfati na sbandò ale. Na banlé kenen i tahà sundang.

⁵Kafnge én, lanket i Tingà Bilibili i gatlu fadkat. Na lêmangu linge i talù i gatlu di fat gambet lmanaf, manan, “Fafal ge, neyem ani.” Na di keyegu teengu i fitam kudà na i to smakay dun magot i timbang. ⁶Na lingegu i satu talù man nawam mdà di bleng i fat gambet lmanaf, manan, “Alò tlu sufa i mse trigu ku demen sgantang na tlu sufa i barli gwè satu to tadenan di sduh. Kabay nangam nket btas i tabè na binu.”

⁷Kafnge én, lanket i Tingà Bilibili i gfat fadkat. Na lêmangu linge talù i gfat gambet lmanaf, manan, “Fafal ge, neyem ani.” ⁸Na di keyegu teengu i kudà bukes, na i dagit i to smakay dun Fati, na nun tmadol kenen satu dnagit Hadis. Na i lwe ani banlé ale glal mati i tngà di kagatngà i dad to di tah tanà fagu di sundang, di kbitil, di dad tduk, na di dad labè lmanaf di bnas.

⁹Kafnge én, lanket i Tingà Bilibili i glime fadkat. Na teengu di dungan i gudamsù di Dwata i dad layef i dad to tafnati mdà di kafaglutla na i ktulenla i Tnalù Dwata. ¹⁰Na toola falbong i talùla, na manla, “E Amumi, i Too Mtulus, ge too mtiu du landè salaam, na too ge gsalig. Tan i klomi fatan i kablém flayam di dad to di tah tanà du balas di kfatila gami?”

¹¹Kafnge én, gablé di kat man satu dale i klaweh bukey, na man i Amula di dale, fye ku ftud ale fa kel di ksikof kfati i kdee lifanan fnati gambet dale, i kdee flanekla di kafaglut di ku Dyisas Krayst.

¹²Na kafnge én, lanket i Tingà Bilibili i gnam fadkat. Na di kimoan ani nun too bong linol, na i duh mbaling fitam salngad i safut too fitam, na i bulen mbaling fulè gambet litè. ¹³Na kdee blatik di langit tatek di tanà

salngad i ktatek i bunge kayu fig muhad ku mbal i nus. ¹⁴Na i langit lana di mata sadi maglulun. Na i kdee bulul na dad fungul mgili mdà di tagne gugkahla. ¹⁵Kafnge én, i kdee harì na dademe mdatah to di tah tanà, na i dad ulu di dad sundalu, na i dad to nun bong knun, na i dad to nun bong glal, na balù dad to fasak, na dad to ise fasak, kdeela slame salbuni déén di dad ilib, na di bleng i dad malbang batu di dad bulul. ¹⁶Na tlola i dad bulul na dad batu, manla, “Mtubak gamu di gami, du fye glidung gami di mata i sudeng di gusudeng i gumdatah, na mdà di klabè i Tingà Bilibili. ¹⁷Du takel i bangla mukum na mlayam gami, na landè fakay gamtayud i kaflyam bléla én.” Ani man i dad to di tah tanà.

I ilè di dad salig Dwata

7 ¹Kafnge én, teengu fat kasaligan Dwata. Na tadag ale di sbalà kilil di tah tanà ani, du nsangla nus du fye là mbal di tah tanà, ku demen di mahin na balù di dad kayu. ²Na teengu satu dademe kasaligan Dwata fdu di gusut i duh. Na nagotan i ilè i too mto Dwata. Na toon falbong i taluan du tlon i fat kasaligan Dwata i nun eneg falmo i tanà na mahin. ³Na manan di dale, “Nangyu tayò falmo i tanà na i mahin na i dad kayu, silangyu falmo ku tafngemi nimò ilè Dwata di angas i dad saligan.” ⁴Kafnge én, nun tmulen di deg ku file i kdeela mafkah ilè Dwata di angasla, dunan mlatu fat falò fat libu slame mdà di kdee lumbuk i dad bel Israél.

- ⁵ Mdà di lumbuk Dyuda, sfalò lwe libu i nun ilè,
mdà di lumbuk Rubén, sfalò lwe libu i nun ilè,
mdà di lumbuk Gad, sfalò lwe libu i nun ilè,
- ⁶ mdà di lumbuk Asher, sfalò lwe libu i nun ilè,
mdà di lumbuk Naftali, sfalò lwe libu i nun ilè,
mdà di lumbuk Manasas, sfalò lwe libu i nun ilè,
- ⁷ mdà di lumbuk Simyon, sfalò lwe libu i nun ilè,
mdà di lumbuk Libay, sfalò lwe libu i nun ilè,
mdà di lumbuk Isakar, sfalò lwe libu i nun ilè,
- ⁸ mdà di lumbuk Sabulun, sfalò lwe libu i nun ilè,
mdà di lumbuk Dyosif, sfalò lwe libu i nun ilè,
na mdà di lumbuk Bénhamin, sfalò lwe libu i nun ilè.

I mlabung dad to lamsak i klaweh bukay

⁹Kafnge én, teengu bong mlabung dad to i landè fakay gamse dun, na i gumdàla di kdee sahal banwe, di kdee sahal lumbuk i dad to, di kdee sahal bung to, na mdà di kdee sahal bung talù. Na tadag ale di muna i gusudeng i gumdatah na di muna i Tingà Bilibili. Na kdeela lamsak bukay klaweh na kat satu dale magot i taglang falmira. ¹⁰Na toola falbong i talùla, na manla, “Dnayenmi Dwatami, i sudeng di gusudeng i gumdatah,

na i Tingà Bilibili
du di dale gumdà i kagalwàmi.”

¹¹Na di kagdayenla Dwata na Tingà Bilibili, kdee kasaligan Dwata sdulê tadag glibut di gusudeng i gumdatah na i dad lwe falò fat ulu, na i dad fat gambet lmanaf, lkuad ale di muna i gumdatah dunan Dwata, na mangamfù ale kenen. ¹²Na manla,

“Amén. Too glut ani.

I Dwataito, too kenen gablà dmawat kdayen, kfangamfù,
kablé fye, na afè,
du kenen mfun i kfulung na glal, na too kenen mtulus,
kel di landè sen. Amén.”

¹³Kafnge é, satu di lwe falò fat ulu smalek deg, manan, “Simto kè dad to kamlaweh bukay ani na nè gufdula?”

¹⁴Na tnmelgu kenen, mangu, “Làgu gadè dun. Ge sa gmadè.” Na manan di deg, “Ale sa i dad to tafdu di too bong kaflayam. Na tamagfukla i klawehla di litè Tingà Bilibili, na tambaling bukay. ¹⁵Taman,

‘tadag ale di muna i gusudeng Dwata,
na mimò ale i knayean mduh na butang di Bong Gumnean,
na i sudeng di gusudeng i gumdatah dunan Dwata, kenen sa too
mifat dale du mnè ale di kenen.

¹⁶Na talà ale lêman bitil,
na talà ale lêman malinum,
ku demen maflayam di kinit i duh,
ku demen dademe dad kinit.

¹⁷Du i Tingà Bilibili, déén di muna i gusudeng i gumdatah, kenen i mifat dale,
na naginan ale di yéél i mlé nawa landè sen,
na Dwata i mifu kdee lwakla.’ ”

Lanket Tingà Bilibili i gfitu fadkat

8 ¹Na di kalket Tingà Bilibili i gfitu fadkat, mbaling manak déén di langit kel di tngà uras i klon.

²Kafnge é, teengu i fitu kasaligan Dwata tagnè tadag di muna Dwata. Na sankat ale banlé satu twang.

³Na nun satu dademe kasaligan Dwata magot i tukang blawen na salu déén mdadong di gudamsù. Na banlé kenen bong fangbun, du tnuan di dad dasal i kdee dad to Dwata, déén di gumtam i fye bun blawen mnè di muna gusudeng i gumdatah.

⁴Na di kafngen mtam dun, salu tah i buk i fye bun ani gagin di dad dasal i dad to nfun Dwata mdà di tukang nagot i kasaligan tadag di muna Dwata.

⁵Kafnge é, nwè i kasaligan Dwata i tukang blawen na fananoan lifoh mdà di gudamsù na batan ditù di tanà. Na kagbatan dun too kmilet, magin i dademe bong uni, na smilà na mlinol.

Fitu twang

⁶Kafnge én, i fitu kasaligan Dwata magot i fitu twang, fatlagad ale myuf dun.

⁷Na nyuf i tnanin kasaligan i kenen twang. Na kagyufan dun mulen lbatù tno na lifoh masbool i litè di tah tanà. Na sakuf i satu alel di tlu alel i klamang banwe, na sakuf i satu alel di tlu alel i kdee kayu, na kdee dad sabat mti sakuf.

⁸Kafnge én, nyuf i galwe kasaligan i kenen twang. Na kagyufan dun gbat ditù di lam i mahin i gambet bong bulul too dminè. ⁹Na mbaling litè i satu di tlu alel di klamang mahin. Na mati satu alel di tlu alel i kdee mnè di mahin, na malmo satu alel di tlu alel i dad snakay di tah mahin.

¹⁰Kafnge én, nyuf i gatlu kasaligan i kenen twang. Na kagyufan dun, mtatek mdà di langit satu bong blatik too dminè, gambet i bong salò. Na mtatek i blatik di satu alel di tlu di kdee dad yéél na sfuten di klamang banwe. ¹¹Na i dagit i blatik ani Féét, na mbaling féét i kdee yéél gumtatekan na dee dad to mati, du gamginum ale i féét yéél.

¹²Na kafnge én, nyuf i gfat kasaligan i kenen twang. Na kagyufan dun nun tadè di duh, bulen, na dad blatik. Taman magwà i knengla. Magwà i gatlu alel kneng i duh na bulen, na magwè i kneng di gatlu alel di kdee blatik. Mdà én nun fat uras di sduh là mneng, na nun fat uras di butang landè mneng. ¹³Na klogu meye ani, lingegu bong talù satu bong kablak mayeng ditù di tah. Na tlu dulè manan, “Too magakdo i dad to di tah tanà.” Na lêman manan, “Too kanlikò i fan kel di kdee dad to mnè di tanà di kyuf kadang i dad tlu dademe kasaligan i dad twangla.”

I kyuf i glime twang

9 ¹Kafnge én, nyuf i glime kasaligan i kenen twang. Na di kagyufan dun, teengu i blatik tamtatek mdà di langit kel di tanà. Na gablé di blatik ani kunsì du lwan i gufusuk di too mngalam sol landè gusenán. ²Na di kagalwan dun, lamwà i too bong buk mdà di sol ani salngad i buk gal lamwà mdà di bong gumnè i lifoh. Na mdà di bong buk ani kmifu i tanà, du maglidung i buk i kneng i duh. ³Na mdà di buk ani lamwà i bong dee tlangas di tah tanà, na gablé di dale gnagan samlad salngad slad i fagi. ⁴Na fnang ale falmo dad sabat, dad kayu, ku demen dad fule. Na alòla fakay fanlayam i dad to landè ilè Dwata di angasla. ⁵Faloh ale mlayam i dad to ani klo i lime bulen, bay fnang ale mati dale. Na kfagula mlayam dale i gambet slad i fagi. ⁶Na di klo i lime bulen ani, i dad to ani too ale mayè ku mlal ale mati, bay landè kibòla, du baling ale mto fa.

⁷Na di kitegu i dad tlangas ani, salngad kbaweh i kudà gatlagad di kasfati. Na man nawam ku nun kyangen blawen di ulula, na dad bawehla salngad baweh to. ⁸Na i wakla salngad wak i libun, na i kifanla salngad

kifan i labè lmanaf liyun. ⁹Na i klung di kfela kbaweh klung tek, na i luk i dad fafakla salngad uni i dee kaditon masalngan dyol i kudà mila salu di kasfati. ¹⁰Na ikongla salngad ikong fagi na sladla too tamduk salngad katduk slad i fagi. Na mdà di ikongla ani gaganla fanlayam i dad to klo i lime bulen. ¹¹Na nun harila mebe dale, dunan i kasaligan Satanas i magot i bong mngalam sol landè gusenana. Na dagitan di talù i dad to Hiebru, dunan Abadon. Na dagitan di talù i dad to Grik, dunan Afolyon. Na i gumtatek i dagitan dunan i Falmo.

¹²Na én gusen i tnanin kanlikò, bay neyeyu, nun fa lwe fan kel.

¹³Na kafnge én, nyuf i gnam kasaligan i kenen twang. Na di kagyufan dun lingegu i talù mdà di fat tomfod slame blawen gumtamla i fye bun di muna Dwata. ¹⁴Na talù kenen di gnam kasaligan nun twang, na manan, “Ftakum i fat kasaligan Satanas i mbakus mdadong di bong yéél dnagit Yufratis.” ¹⁵Taman ftakun dad fat kasaligan Satanas i tagatlagad di fali, bulen, duh, na uras ani, mati satu ael di tlu ael di kdee dad to di klamang banwe. ¹⁶Gtulen di deg nun lwe latu dulê libu i libuhan dad sundalu kmudà. ¹⁷Na teengu i tafite di deg, dunan dad kudà na i dad sundalu smakay dun. Na i dad smakay nun klung di kfela na slame mbatak fulè salngad dinè i lifoh, na too mlunu gambet i batu safira, na mlalél gambet sandawà. Na i ulu dad kudàla salngad ulu i labè lmanaf liyun, na lifoh, buk, na sandawà lamwà mdà di bà i dad kudà ani. ¹⁸Na mati satu ael di tlu ael i kdee to di tah tanà fagu di tlu flayam, dunan lifoh, buk, na sandawà i lamwà di bà i dad kudà. ¹⁹Na gagan i dad kudà mati i dad to fagu di dad bàla na ikongla. Na dad ikongla salngad dad ulad du nun ulula, na ani fatdukla i dad to.

²⁰Kabay i dad to mtagak, i dad to là mati di dad flayam ani, là ale sa msal di dad sasè nimò mgimòla, na làla knagol i kfangamfùla di dad busaw, na di ise glut dwata galla nimò mdà di blawen, salafi, tabaga, batu, na kayu, i dad fnangamfù là mite, là mlinge, na là gagu. ²¹Na dad to ani làla nsal na tnagak i dad kbanòla, na kimòla i dad tnikeng fagu di dad busaw, na kimòla dad sasè knayè i lawehla na demen i ktakula.

Kasaligan Dwata na i tukay surat maglulun

10 ¹Kafnge én, teengu satu dademe kasaligan Dwata mtulus, fdanà mdà di langit. Sadi kenen kamlaweh i labun, na nun lawélawé glibut di ulun. Na i bawehan gambet kneng i duh, na i dad blian gambet lahan dminè. ²Na magot kenen i tukay surat maglulun tamgukal. I blian gsen di kwanan daan di mahin na i blian gsen di ibeng daan di tanà. ³Na falbongan i taluan na i taluan salngad i bong kngal i labè lmanaf liyun. Kafngen talù, tmimel i kilet fitu dulê. ⁴Kakubu i kmilet fitu dulê, tafangu surat i lingegu, bay nun fa lingegu talù mdà di langit, na manan di deg, “Bunim i gman i kilet fitu dulê gine, na nangam surat.”

⁵Kafnge én, i kasaligan Dwata tateengu tadag di mahin na di tanà, tayalan i sigalan kwanan ditù di langit. ⁶Na smafà kenen fagu di dagit Dwata i landè gusenán, mimò i langit na kdee mnè déén, na i tanà na kdee mnè déén, na i mahin na kdee mnè déén, na manan, “Talandè guganggà i fan mkel ani. ⁷Kabay ku takel i bang kyuf i gfitu kasaligan i kenen twang, too glut dnohò Dwata i tagnè fandaman bunin di muna, bay di muna fgadean di dad to saligan, dunan i dad tugadan.”

⁸Kafnge én, lêmangu linge i talù talingegu gine mdà di langit, manan, “Salu ge di kasaligan Dwata tadag di mahin na di tanà, na nweam i tukay sulat mgukal nagotan.”

⁹Na taman salu agu ditù di kasaligan na fnigu di kenen i tukay sulat nagotan. Na manan di deg, “Hae, nweam na knaanam, du too mi ku di lam i baam gambet tñab, bay ku kel kadang di lam i tienam mbaling too féét.”

¹⁰Na di kagwègu i tukay sulat knaangu, na too glut, too mi gambet i tñab, bay di kaflogu dun féét di lam i tiengu.

¹¹Na nun talù di deg, manan, “Là fakay ku laam too tulen lèman i dademe fgadè di ge gablà di fan kel di dad sahal to, dad sahal banwe, na dad sahal talù, na dad sahal hari.”

Lwe to tmulen i Tnalù Dwata

11 ¹Na kafnge én, nun gablé di deg btas gambet i tugad na dekan agu, manan, “Salu ge di Bong Gumnè Dwata na bantasam, na bantasam i gudamsù, na nsem ku file dad to gal mangamfù déén. ²Kabay nangam bantas i nasel gumangamfù dad to di lwà i Bong Gumnè Dwata, du ani tagablé di dad to ise Dyu, i gal dmuen Dwata. I dad to ani falmola kadang i syudad Dyérusalém, i banwe Dwata klo i fat falò lwe bulen, dunan mlibu lwe latu nam falò butang. ³Na dekgu i lwe togu kamlaweh saku, na banlégu ale eneg samtulen i Tnalùgu fgadègu di dale, klo mlibu lwe latu nam falò butang.”

⁴Na lwe to Dwata ani, i guflingen dale dunan lwe kayu dnagit olib na lwe gufkah i salò tadag di muna Dwata, gumdatah i kdee di klamang banwe. ⁵Na ku nun mayè mlayam i dad to Dwata ani, nun lifoh lamwà di bàla na falmo i dad to fan fsasè dale. Na taman én sa i kibò mati i dad to mayè mlayam dale. ⁶Na i lwe to ani, gablé di dale tulus msang i langit, du fye là mulen di klola tmulen Tnalù Dwata i fgadean di dale. Na nun tulusla fbaling litè i dad yéél, na mlayam i dad to fagu di dee bung kaflayam balù tan bang i kayèla mimò dun.

⁷Na di kafngela tmulen Tnalù Dwata i fgadean dale, nun bong labè lmanaf lamwà mdà di bong mngalam sol i landè gusenán, na sanfatin ale, gfsanan ale na fnatin ale. ⁸Na i dad lawehla tatì gtidol di dalan i bong syudad, dunan banwe gumlansang i Amula Dyisas di krus. I guflingen syudad ani, dunan Sodom na Idyif. ⁹Na tlu duh tngà i klon dee dad to mdà

di dad sahal to, na dad sahal lumbuk i dad to, na dad to sahal bung talù, na dad to mdà di sahal banwe, salu déén na neyela i dad laweh i dad mati ani, na fnangla falbang. ¹⁰Na di kfatila i dad to tugad Dwata ani, kdee dademe to di tah tanà too lehew, na baling ale mimò i fista na nun kasabléla. Lehew ale, du i lwe to tugad Dwata ani, tatoola fanlayam i dad to mnè di tah tanà.

¹¹Kabay di kakubu i tlu duh tngà, nun nawa mdà di Dwata fusuk di lwe to mati ani, na mto ale lêman, na tadag ale. Na i kdee dad to mite dale too ale likò.

¹²Na di taktola, lingela i bong talù mdà di langit, na manan di dale, “Salu gamu dini.” Na di keye i dad to dmuen dale, magket ale salu di langit magin di labun.

¹³Klola magket salu tah, too mlinol, na malbà i satu alel di sfalò di dad gumnè di syudad, na fitu libu i dad to mati mdà di linol ani, na kalbong i dad to mtagak i là mati, too likò, na dnayenla i kdatah Dwata ditù di langit.

¹⁴Na én gusen i galwe kanlikò, bay neyeyu, nun fa satu fan kel.

I kyuf i gfitu twang

¹⁵Kafnge én, nyuf i gfitu kasaligan i kenen twang. Na di kagyufan dun nun dad mkit mdà di langit, na manla,

“I glal magot i klamang banwe di tah tanà i gfun Amuito Dwata na i To Mgalékan,
na kenen magot kel di landè sen.”

¹⁶Na i lwe falò fat ulu sudeng di muna Dwata lkuad ale na mangamfù ale di kenen. ¹⁷Na manla,

“Amumi Dwata Too Mtulus, ge i tagnè mdà di kagatbuan kel ani,
mlé gami bong fye di ge,
du tafitem i bong glalam
na tatanbuam magot i kdee di klamang banwe.

¹⁸Na i dad to dmuen ge too ale flabè,
bay tafitem i kalbutam.

Na ani takel i bangam mukum i dad to tamati,
na bangam mlé i untung di dad saligam dunan dad tugadam,
na di kdee dad to nfunam, na kdee mafè ge,
balù mdanà ku demen mdatah.

Na takel i bangam too falmo i dad to gal falmo i dad to di tah tanà.”

¹⁹Kafnge én, malwa i gumangamfù di langit, na teengu di laman i kaban gugkah i gusmulat i dad fakang Dwata di dad ton. Di kitegu ani, smilà, na nun bong uni, na too kmilet, na mlinol, na too mulen i dad lbatù tno.

I libun na i bong lmanaf naga dnagit dragon

12 ¹Kafnge én, nun teengu di langit satu too bong gamtikeng nun gumtatekan, dunan satu libun msut, na lakuan i duh, na i bulen

di dungan i blian, na di tah ulun nun kyangen, dunan sfalò lwe blatik.
²Maltien kenen na fan sut i tingaan, na mkít kenen du lyon i katdukan.

³Na nun fa satu too gamtikeng msut di langit nun gumtatekan, dunan i too bong naga fulè, dnagit dragon. Na fitu i ulun na sfalò i sungketan, na di kat ulun nun kyangenan. ⁴Na fagu di ikongan dyolan satu alel mdà di tlu di kdee blatik na ftatekan ditù di tanà. Na tadag kenen di muna i libun fan sut i tingaan, du fye knaanan i tingà di ksutan. ⁵Na di ksut i tingà i libun ani, lagi. Na landè kibò i naga kmaan i tingà lagi falami sut du nun samkot dun, na neben salu di gusudeng Dwata di langit. Na nun duh kadang magot kenen i kdee dad banwe di tah tanà, na landè gamfisan kenen. ⁶Na i libun ani mila kenen di banwe gulandè to, du nun gumnean tafatlagad Dwata kenen. Na déén gumifat Dwata kenen mlibu lwe latu nam falò duh i klon.

⁷Na di bang én, nun bong kasfati di langit. Mikaél, i ulu di dad kasaligan Dwata, na i dademe kasaligan mdanà di kenen, sanfatila i bong naga fulè dnagit dragon na malas i naga na i dad kasaliganan. ⁸Kabay fisan i naga na i dad kasaliganan, na fnang dale mnè fa di langit.

⁹Taman batla i bong naga na i dad kasaliganan mdà di langit ditù di tanà. Na i bong naga ani, dunan i ulad mdà di muna fa dnagit busaw, na Satanas én gal mgaw i dad to di klamang banwe.

¹⁰Kafnge én, lêmangu linge i bong talù mdà di langit, manan,

“Ani i kagdohò i kafalwà Dwata i dad to,
 na tafite Dwata i bong glalan magot i kdee,
 na tambù i kagotan,
 na tanun glal i To Mgalékan, dunan Krayst Dyisas.
 Du i dmalam dad flanekito di kafaglut
 mduh na butang di muna Dwata,
 tabat mdà di langit.

¹¹Na dad flanekito di kafaglut tagfisanla Satanas

fagu di litè i Tingà Bilibili,
 na mdà di ktulenla i Tnalù Dwata.

Na là mabtas di dale i nawala,
 bay gatlagad ale mati.

¹²Taman flehew gamu dad mnè di langit,

bay too magakdo gamu dad mnè di tanà na di mahin,
 du tadéén gukel Satanas,
 na too sè kaflabean,
 du gadean fukal nan i duh.”

¹³Na kagatwan i bong naga ani, tagbat kenen ditù di tanà, na dlun i libun i sut tingaan lagi. ¹⁴Kabay i libun, banlé Dwata kenen lwe fafak gambet fafak i bong kablak, du fye gayeng kenen mdà di bong naga ditù di gufnè kenen di banwe gulandè to i gumifat Dwata kenen di lam

i tlu fali tngà, du fye là gnumah kenen i bong naga. ¹⁵Na i bong naga ani, dfun bong yéél gambet i bong dunuk mdà di baan, du kayean ku manul i libun. ¹⁶Kabay i tanà tmabeng i libun, du nsafan i bong yéél mdà di bà i bong naga. ¹⁷Na ani baling gatnù i kaflabè i naga di libun. Taman mdà kenen du sanfatin i kdee bel i libun ani, dunan i kdee dad to mimen i flalò Dwata di dale, na tmulen i kaglut gablà di ku Dyisas. ¹⁸Na i bong naga dnagit dragon, tadag kenen di falak di kilil i mahin, du nun fatanan.

Lamwà i satu bong lmanaf mdà di mahin

13 ¹Kafnge én, teengu i bong lmanaf i too kanlikò lamwà mdà di lam i mahin. Na nun sfalò sungketan na fitu ulun. Na di kat satu sungketan nun kyangenan, na gsulat di kat ulun i dagit too sasè, du falmo i kdatah Dwata. ²Na i kitegu i bong kanlikò ani, gambet baweh i too bong yaw lag dnagit léofardo, bay i dad blian mahal gambet i bong labè lmanaf dnagit béar, na i baan gambet bà i bong liyun. Na blé i naga di bong lmanaf too kanlikò, i kenen tulus na glal magot salngad i bong glal i hari. ³Na i bong lmanaf i too kanlikò ani nun seey di satu ulun man nawam mati, bay tamgulè nan. Na i dad to di klamang banwe too ale tikeng, taman dee ale mlalò i bong kanlikò én. ⁴Na fnangamfù i dad to i bong naga, hae du tablén sa i glalan di bong kanlikò, na fnangamfùla i bong kanlikò, na manla, “Landè fakay gasngad di bong kanlikò ani. Na landè gamfisan dun.”

⁵Na i kdee kafdag na i too sasè gman i bong kanlikò gablà di Dwata tati faloh Dwata. Na faloh Dwata kenen mimò i knayean klo di fat falò lwe bulen. ⁶Ku talù i kanlikò ani galan falmo i kdatah Dwata, na too dee dad sasè manan gablà di dagitan, na i gumnean, na kdee dademe mnè di langit di saféd Dwata. ⁷Na faloh Dwata i bong kanlikò samfati i dad to Dwata na fnisanan ale. Na nun blé di kenen glal magot i kdee sahal lumbuk i dad to, na i kdee sahal bung to, na i kdee sahal talù, na i kdee sahal banwe. ⁸Na i dad to di tah tanà mangamfù ale di bong kanlikò, i kdee là gsulat dagitla di libru gugsulat dagit i dad to nun nawa landè sen, i tagnè gsulat déén di là fa mgimò i banwe. Na i Tingà Bilibili tafnati, kenen mfun libru ani.

⁹Taman ku nun klingeyu too gamu flinge. ¹⁰Ku én knayè Dwata di satu to bnilinggù kenen, na bnilinggù sa. Na ku én knayè Dwata di satu to bnanò kenen sundang, na bnanò sa. Na taman gito dad to nfun Dwata, too mabtas di gito ku too ito tmayud di kaflayam kel di gito na too ito smalig di kenen.

Msut i galwe bong kanlikò na lamwà mdà di lam i tanà

¹¹Kafnge én, teengu satu fa bong lmanaf i too kanlikò msut, na lamwà kenen mdà di lam i tanà. Na nun lwe sungketan, gambet sungket i tingà

bilibili. Kabay i taluan gambet talù i naga. ¹²Na i galwe kanlikò ani nun glalan gambet i glal i muna bong kanlikò i mdek kenen. Na nlegesan i kdee dad mnè di tah tanà, du fye mangamfù ale di muna bong kanlikò, i tagseey satu ulun, bay tamgulê. ¹³Na i galwe bong kanlikò too dee nimoan dad gamtikeng, balù kel di kaftatekan lifoh mdà di langit kel di tah tanà di mata i dad to. ¹⁴Na gafgawan i dad to di tah tanà fagu di nimoan dad tnikeng gfaloh i bong muna kanlikò. Na dekan i dad to di tah tanà mimò alung i kafbaweh i muna bong kanlikò gseey i sundang bay tamgulê. ¹⁵Na lêman faloh Dwata i galwe kanlikò ani mlé nawa di alung i muna bong kanlikò, du fye gталù, na gaganan mati i kdee dad to i là mangamfù di kenen.

¹⁶Na i galwe kanlikò ani nlegesan kdee dad to, dad to mdatah, dad to mdanà, dad to bong knun, dad to landè, dad to fasak, na dad to ise fasak, du fye fafkahan i ilè di kmalla gsen di kwanan ku demen di angasla, ¹⁷du fye landè to gambayad na gamfabli silang ku nun ilean. Na i ilè fkah di dad to, dunan i dagit i muna bong kanlikò, ku demen numiru i dagitan.

¹⁸Silang glabat i satu to i gumtatek i dagit i bong kanlikò na i numiru i dagitan ku nun kfulungan mdà di Dwata. Na ku nun kfulungan, fye ku nubadan i numiru i bong kanlikò, du tagbuni i dagitan di numirun, na i numirun dunan nam latu nam falò nam.

I klingag dad to galwà

14 ¹Kafnge én, teengu i bulul Sion, na tadag ditù i Tingà Bilibili na nun magin di kenen mlatu fat falò fat libu dad to. Na kat satu dale nun gsulat di angasla dagit Tingà Bilibili na i dagit Maan Dwata. ²Na lingegu i talù mdà di langit, i unin gambet i bong fikong na i uni bong kilet. Na i talù lingegu gambet i dee dad to kambit i dad arfala. ³Na i mlatu fat falò fat libu to tadag smalu di gusudeng i gumdatah, na di fat gambet lmanaf, na di lwe falò fat ulu, mlingag ale i falami lingag. Na alò dad mlatu fat falò fat libu to ani, i gmagan gambet i lingagla, du ale i tansò Tingà Bilibili mdà di dad salàla di tah tanà. ⁴Na i kdee dad to ani mlaneb, na landè fakay mlé dale salà di muna i Amula Dwata. Na samnagin ale i Tingà Bilibili balù tanè gusalun. Tansoan ale mdà di dademe dad to, du salngad ale i muna kantu gablà blé di Dwata na di Tingà Bilibili. ⁵Na dad to ani, là lmenla tmulen kéng, du landè gukulangla.

I tlu kasaligan Dwata

⁶Kafnge én, teengu satu kasaligan Dwata mayeng, na too mdatah kayengan. Na tulenan i Fye Tulen landè gusenán di dad to di tah tanà, di kdee sahal banwe, na di kdee sahal lumbuk i dad to, na di kdee sahal talù, na di kdee sahal bung to. ⁷Na falbongan i taluan, manan, “Tooyu nafè Dwata na dnayenyu i kdatahan, du takel i bangan mukum i kdee

dad to. Tooyu fnangamfù kenen i mimò kdee, langit, tanà, mahin, na i dad yéél.”

⁸Na nun galwe kasaligan mayeng gamtadol, na manan, “Tamalmo, tamalmo i bong banwe dnagit Babilon. Di muna fa, mdatah banwe, bay flangalla binula i dad to di kdee dad banwe, dunan i toola kimen i sasè knayè i lawehla, na mdà di dale, i dad to mdà di kdee banwe lalòla i dale nimò.”

⁹Na nun gatlu kasaligan gamtadol di lwe ani gine. Toon falbong i taluan, manan, “Ku simto mangamfù di bong kanlikò na i alung kafbawehan, na dmawat i ilean di angasan ku demen di kmalan, ¹⁰gamdawat kenen i flayam du mdà di too kaflabè Dwata. Na i dad to salngad i to én too fanlayam Dwata fagu di lifoh na sandawà dminè, di muna i dad kasaliganan na i Tingà Bilibili. ¹¹Na landè gusen i buk mdà di lifoh i gumaflayamla, na landè gugaftud i dad to mangamfù di bong kanlikò na i kafbawehan, na i dmawat ilè i dagitan, du maflayam ale mduh na butang kel di landè sen.” ¹²Taman gito dad to nfun Dwata, i dad to mimen i flaloan na smalig di ku Dyisas, too mabtas ku tmayud ito di kdee kaflayam kel di gito.

¹³Kafnge én, lingegu i talù mdà di langit, manan, “Sulatam ani. Tambù di duh ani, too nun kafye i dad to mati mdà di ksatula di Amula Dyisas.” Na talù i Tulus Dwata, manan, “Too glut ani. Too nun kafye, du gaftud ale di dad nimòla, na gamdawat ale kadang i untung mdà di dad fye nimòla.”

I kaktu di tah tanà

¹⁴Na di keyegu teengu satu bukay labun na nun sudeng di tah labun na i bawehan i tingà to na nun kyangenan blawen na kitinan i gamban sangget. ¹⁵Na nun fa satu kasaligan Dwata lamwà mdà di gumangamfù di Dwata, na toon falbong taluan tamlo di to sudeng di labun, manan, “Nebem i sanggetam na tambù ge kamtu i fulem du taga nan, du ani i bang kaktu di tah tanà.” ¹⁶Taman i to sudeng di tah labun walan i sanggetan di tah tanà, na tamaktu i kdee taga di tanà.

¹⁷Na nun dademe kasaligan Dwata lamwà mdà di gumangamfù di Dwata di langit, na nagotan i gamban sangget. ¹⁸Na nun fa satu kasaligan lamwà mdà di gudamsù di Dwata di lam i gumangamfù di Dwata, dunan i kasaligan munung i lifoh na toon falbong i taluan tamlo di kasaligan magot i gamban sangget, manan, “Nebem i sanggetam, na kantum dad bunge grép di tah tanà du taga nan.” ¹⁹Taman wal i kasaligan i sanggetan di tah tanà na tamaktu i dad bunge grép, na batan di gumlà Dwata, dunan i kaflabè Dwata na i flayaman i dad to sasè. ²⁰Na i bunge grép ani fanlàla ditù di lwà i banwe, na lamwà mdà di gumlà dun too bong litè, na kngalam i gudmunukan sdife, na mdadong tlu latu kilumitru kawag i gumalohan.

I fitu kasaligan i mebe i fitu flayam

15 ¹Kafnge én, teengu i satu too bong gamtikeng ditù di langit. Nun fitu kasaligan Dwata mebe i fitu bung flayam. Na di kafnge kadang i fitu dad flayam ani, ani gusen i kaflabè Dwata.

²Na teengu i gambet mahin, bay sfihu i kbawehan, na masbool i lifoh. Na teengu i dad to gamfisan i bong kanlikò na i alung i kafbawehan, du làla dnawat i numiru i dagitan. Na kdeela tadag di kilil i mahin kafbaweh sfihu, na kat satu dale magot i gambet fuglung dnagit arfa tablé Dwata dale. ³Na kdeela mlingag i lingag Mosis i lifan Dwata, na i lingag Tingà Bilibili. Na ani manla,

“Amumi Dwata Too Mtulus,

too mdatah na too gamtikeng i kdee dad nimoam.

Ge i too glut Harì di kdee dad to di kdee dad banwe,

na too matlu na too glut i kdee dad nimoam.

⁴E Amumi, kdee dad to mafè ge,

na dmayen na fdatah ge,

du ge alò i too mtiu du landè salaam.

Kdee dad to di kdee banwe salu ale kadang di ge,

na mangamfù ale di munam,

du tateenla i kdee dad nimoam too matlu.”

⁵Kafnge én, lèman nun fite di deg, na teengu lanwa i gumangamfù di Dwata déén di langit, na teengu i Too Mdatah Sibay i gumnè Dwata. ⁶Na lamwà di gumangamfù di Dwata fitu kasaligan mebe i fitu bung flayam, na kamlaweh ale bukay too mlaneb na too mneng, na nun blawen glabéd di dad kfela.

⁷Na satu di fat gambet lmanaf sankatan banlé tukang blawen i fitu kasaligan. I dad tukang én too fnò i kaflabè Dwata, i Dwata mto landè gusenán. ⁸Na i gumangamfù Dwata too fnò buk, du mdà di bong kdatahan na ktulusan. Na landè fakay fusuk di gumangamfù én, silang ku tafnge i fitu bung flayam nebe i fitu kasaliganan.

I kakok dad kasaligan i fitu tukang

16 ¹Kafnge én, lèmangu linge bong talù mdà di gumangamfù di Dwata, na ani manan di dad fitu kasaligan, “Mdà gamu na kokyu di tanà i lam i dad fitu tukang gugkah i bong kaflabè Dwata.”

²Taman mdà i tnanin kasaligan na kokan i kenen tukang di tah tanà. Di kagkokan kenen tukang, kel di dad to i dmawat ilè i bong kanlikò na mangamfù di kafbawehan malbang bkukang too sasè na too tanduk.

³Kafnge én, mdà i galwe kasaligan na kokan i kenen tukang di tah mahin. Na di kagkokan kenen tukang, i mahin mbaling litè gambet litè i to mati, na kdee lmanaf di lam i mahin mti mati.

⁴Kafnge én, mdà i gatlu kasaligan na kokan i kenen tukang ditù di dad yéél na dad sfuten. Na di kagkokan kenen tukang mbaling litè i dad yéél.

⁵Na lingegu i gman kasaligan Dwata i magot dad yéél, manan,

“E Dwata, too ge mtiu, du landè salaam,
na tagnè ge mdà di kagatbuan kel ani,
na too matlu i kukumam
fagu di kfebem dad flayam ani.

⁶Du tafalohla litè i dad to nfunam, na tafnatila dad tugadam,
taman tafninumam ale i litè,
du ani untungla di dad sasè nimòla.”

⁷Kafnge én, nun lingegu tmimel mdà di gudamsù, manan,

“Hae, Amumi Dwata Too Mtulus,
too glut na matlu i dad kukumam.”

⁸Kafnge én, mdà i gfat kasaligan na kokan i kenen tukang ditù di duh. Na di kagkokan kenen tukang i init i duh mbaling init i lifoh, na gaganan smakuf i dad to di too sasè kinit. ⁹Na nun dad to sakuf mdà di sasè kinitan, taman too sasè manla du falmola i kdatah Dwata i magot i dad flayam. Kabay là ale msal na kmagol i dad salàla, na là ale dmayen i kdatahan.

¹⁰Kafnge én, mdà i glime kasaligan na kokan i kenen tukang di gusudeng i bong kanlikò. Na di kagkokan kenen tukang mbaling kmifu i kagot bong kanlikò, na nakét i dad to déén i dilàla, du too sè katduk.

¹¹Na falmola i kdatah Dwata di langit fagu di sasè gmanla, hae du mdà di too sasè katduk i lyalola, na i too dee bkukangla. Kabay knean là ale msal na kmagol i sasè nimòla.

¹²Kafnge én, mdà i gnam kasaligan na kokan i kenen tukang ditù di bong yéél dnagit Yufratis. Na di kagkokan kenen tukang, i yéél én mbaling kafag, du fye nun dalan i dad harì fan kel mdà di gusut i duh. ¹³Kafnge én, teengu tlu busaw i kafbaweh fak. Na i satu busaw lamwà mdà di bà i bong naga fulè dnagit dragon, na i galwe busaw lamwà mdà di bà i bong kanlikò, na i gatlu busaw lamwà mdà di bà i tugad Satanas. ¹⁴Na i dad tlu busaw ani mdà ale di ku Satanas, na too dee gamtikeng nimòla. Na salu ale di kdee dad harì di klamang banwe du santifunla i dad sundalula, du fatlagad di bong kasfati di Dwata i Too Mtulus di mabtas duh tamgalékan.

¹⁵Na man Krayst Dyisas, “Toom fanlinge i mangu ge. Kakelgu gambet kakel i to tmaku, du landè gmadè ku tan i duh dun. Na nun kafye di to là kudang di klon fatan, bay fadlug lamsak i klawehan, du fye gatlagad na laan flaweh na laan myà di kakelgu.” Ani gman Dyisas.

¹⁶Na i dad busaw gine santifunla i dad harì na dad sundalula di satu banwe dnagit Armagédon di talù i dad to Hibru.

¹⁷Kafnge én, mdà i gfitu kasaligan na kokan i kenen tukang di bleng i langit na tanà. Na kagkokan i kenen tukang nun satu bong talù mdà

di gumangamfù di Dwata fdu di gusudeng i gumdatah, manan, “Tafnge sa nan.” ¹⁸Na too smilà, na nun dad bong uni, na too kmilet, na too mlinol. Landè gasngad i bong linol ani tambù fa di kagatbù i dad to di tah tanà. ¹⁹Na i bong banwe Babilon malmo, na masatngà di tlu. Na dademe malbang banwe tamalmo. Na là glifet Dwata i bong sasè nimò i dad to di bong banwe Babilon. Taman fninuman ale i binun, dunan toon ale fanlayam du mdà di kaflabean dale. ²⁰Na i kdee dad fungul na kdee dad bulul mti lana di mata. ²¹Na nun malbang lbatù tno mtatek mdà di langit, na i kablat i kat satu lbatù ani mdadong lime falò kilu, na tatek di tah i dad to. Na too dee sasè gman i dad to i falmo i kdatah Dwata, hae du mdà di too sè flayam febe Dwata di dale.

I libun mkat lagi smakay i satu lmanaf too kanlikò

17 ¹Kafnge én, salu di deg satu di fitu kasaligan Dwata magot i tukung, na manan di deg, “Magin ge deg na fiteta ge i flayam blé Dwata kadang di libun too dilè mkat lagi, dunan i bong banwe mdadong di dee dad yéél. ²Na dad harì di tah tanà, magin ale di magagyà nimò i libun mkat lagi. Na dee dademe dad to di tah tanà gagin di kenen di kimoan sasè knayè i lawehan na sadi mbaling ale langal di ksasè nimò.”

³Na lêman agu nebe i kasaligan fagu di Tulus Dwata di banwe gulandè to. Na teengu i libun sudeng di tah i bong lmanaf too kanlikò bnatak fulè, i nun fitu ulun na sfalò sungketan, na gsulat di kenen i dee sasè dagit i falmo kdatah Dwata. ⁴Na lamsak i libun i too mabtassafut mlunu na fulè, na dee dad kas blawen, mabtassafut batu, na férlas. Na nun kitinan tabù blawen fnò i kdee bung too sasè nimoan i galan kakat lagi. ⁵Na gsulat di angasan satu dagit na gbuni i gumtatek i gman déén, manan,

“Ani bong banwe Babilon
i gumdà i kdee dad libun mkat lagi,
na kdee dademe bung i dad too magsik nimò di tah tanà.”

⁶Na teengu talangal i libun ani, langal di litè i dad to nfun Dwata, i dad mati mdà di kafaglutla di ku Dyisas.

Na di kitegu kenen toogu tikeng. ⁷Na i kasaligan Dwata talù di deg, manan, “Tan i duenam too tikeng? Tulenta ge i gumtatek i libun ani, na i bong kanlikò i snakayan i nun fitu ulun na sfalò sungketan. ⁸Na i lmanaf too kanlikò teenam mnè di tah tanà di muna, bay ani tamati, tabat kenen di lam i mngalam sol landè gusen. Kabay nun duh kadang lamwà kenen mdà di bong mngalam sol, du fye fadlug di gumaflayaman. Na én dad to là gsulat i dagitla di libru gugsulat dagit i dad to gamfun nawa landè sen di là fa mgimò i klamang banwe, too ale tikeng di kitela i kanlikò ani. Tikeng ale, du di muna fa, mnè kenen di tanà, na sadni tamati, bay lê samfulè.

⁹“Silang glabat satu to i gumtatek ani, ku nun kfulungan mdà di Dwata. Na i dad fitu ulu i kanlikò ani, dunan fitu bulul gusudeng i

libun na satu gumtatekan dunan fitu hari. ¹⁰Lime di dale tagfisan, na i satu magot fa i banwe, bay nun satu là fa kel, bay ku takel, là sa mlo i kagotan. ¹¹Na gablà di bong kanlikò mnè di muna di tah tanà, bay sadni tamati, kenen i gwalu hari. Na kenen satu di dad fitu gine, na fadlug kenen di gumaflayaman.

¹²“Na lêman i sfalò sungket i kanlikò i teenam dunan sfalò dad hari, bay là fa tambù i kagotla. Nun duh kadang nun glal gablé di dale magot i banwe gagin di bong kanlikò, bay là mlo kagotla. ¹³Na i sfalò hari ani sasatu i nawala. Taman bléla di bong kanlikò i dale eneg na glal. ¹⁴Na sanfatila kadang i Tingà Bilibili. Kabay gfisanan ale, du Dyisas i Amu di kdee dad amu, na kenen i Hari di kdee dad hari. Na magin di kenen i dad to tamgalékan, dunan i dad to too gsalig di klalòla kenen.”

¹⁵Na lêman talù kasaligan Dwata di deg, manan, “Na i dad yéél teenam én gusudeng i libun mkat lagi, dunan i dee sahal dad to mdà di kdee sahal banwe na mdà di kdee sahal talù.

¹⁶“I bong kanlikò ani na i sfalò sungketan tateenam, dunan i dad sfalò hari, na balingla knang nawa i libun mkat lagi. Na falmola kenen du nwèla di kenen i dad knunan gagin i klawehan, na knaanla ungadan, na i gtagak snakufila di lifoh. ¹⁷Hae, gamgimò ale én, du Dwata fkah dun di nawala, du fye gdohò i knayean. Taman sasatu nawala mlé i glalla magot di bong kanlikò kel di kagdohò i dad tnalù Dwata. ¹⁸Na i libun mkat lagi tateenam, dunan i bong banwe magot kdee dad hari di tah tanà.”

Malmo banwe Babilon

18 ¹Kafnge én, teengu satu kasaligan Dwata fdanà mdà di langit. Nun bong glalan na i knengan magtuyal i klamang banwe. ²Toon falbong i taluan, manan,

“Tamalmo nan. I bong banwe Babilon tamalmo,

na ani tambaling gumnè

i dad sasè tulus,

i dad busaw,

na i kdee bung sasè na magagsik anuk di bnas.

³Na takel kdee ani di dad to di kdee sahal banwe,

du magin ale di libun, dunan i banwe Babilon, mimò too sasè

knayè i lawehla,

na i dad hari di tah tanà magin di kimoan i magagyà nimò,

na dad to gal fabli di tah tanà, mbaling ale dad to nun bong knun,

du mdà di kbayadan i kdee kayean.”

⁴Kafnge én, lingegu satu talù mdà di langit, manan,

“E dad togu, lamwà gamu di banwe én,

du fye là gamu gagin di kagsalà i sasè libun ani,

du fye là gamu gakuf di kaflayaman kadang di fulé duh,

- 5 du i dad salaan tatoo maslasud na tagafat di langit,
na là sa glifet Dwata i too sasè nimoan.
- 6 Na bnalas di kenen i kaflayam i galan flayam gamu,
na ku tan i kalbong i flayaman i dademe, lwe dulê i kablat i
kaflayam i flayam Dwata kenen.
Na ku tan i kaflabè i libun ani di gamu, lêman lwe dulê fa i kablat i
kaflabè Dwata kenen.
- 7 Salngad di kafdatahan i kton na kimenan i sasè knayean,
én sa kablat i kaflayam na klidù nawa i blé di kenen.
Fdag kenen, manan, ‘Agu i satu gumdatah, ise agu satu libun
balu,
na landè klidù nawagu kel di landè sen.’
- 8 Taman du ani manan, baling mlal kel di kenen dad kaflayam,
i sasè tduk, i bong klidù nawa, na kbitil.
Na snakuf kenen kadang di lifoh na mti sakuf,
du Amuito Dwata i mukum na mlayam kenen, too mtulus.
- 9 “Na i dad hari di tah tanà, i gagin di kenen di kimoan i too sasè
knayè i lawehan, too ale mngel na too ale mlanu di kitela i buk ksakuf
kenen. 10 Na tadag ale fawag, du too ale likò, du ken gakuf ale di bong
kaflayaman. Na kdeela mangman,
‘Magakdo. Tay magakdo,
du di muna fa bong banwe Babilon too mdatah,
bay tatoo mlal kakel i kalmom.’
- 11 “Na dad to gal fabli mngel na mlanu, du mdà di kalmon, du
talandè dad to mayad i dad fablila, 12 i blawenla na dad salafila, na
dad mabtas batula, na i dad férlas, na i dad dee bung safut mabtas,
mlunu na fulè, na i kdee bung kayu too mangbun, dad kandeem
nimòla mdà di malbang kifan dad lmanaf éléfanti, mabtas kayu,
tabaga, tek, na dad batu dnagit marmol. 13 Na talandè mayad i dad
bol uten, na i too fye bun gal falbuk, bulung dnagit mira, dademe
fangbun i litak i kayu, dad binu, tabè, arina, trigu, dad baka, dad
bilibili, dad kudà, na dad sbung kariton gal snakay i dad to, na dad
to fasak na dademe dad to bnlanggù galla fabli. Kdee ani landè nan
mayad dun.
- 14 “Na man i dad to gal fabli di libun guflingen i banwe Babilon, manla,
‘I kdee dad knunam i toom nibal talandè nan gdè, mti malmo, na i dad
gafye nawam talana di ge.’
- 15 “Na i dad gamwè bong knun mdà di kafablila i dad mabtas déén,
tadag ale kadang too fawag, du too ale likò ku gakuf ale di too sasè
kaflayaman. Too bong klidù i nawala na mngel na mlanu di gaslok i
banwe ani, 16 na manla,
‘Magakdo. Tay magakdo i bong banwe ani,

du tagnè gal kamlaweh i safut too mabtas, mlunu na fulè,
na tagnè mkas blawen, na dad batu too mabtas, na dad férlas.

17 Kabay di là mlo ani, i kdee dad knunan tatoo mlal malmo.’

“Na i kdee to mebe i dad kafal, na i dademe mimò di dad kafal, i kdee to smakay, na i kdee to meye i klidùla di tah i mahin, slame ale tadag too fawag. 18 Na di kitela i buk mdà di ksakuf i banwe ani, kdeela mkit na manla, ‘Landè dademe banwe gasngad i bong banwe Babilon.’ 19 Na du too mlidù i nawala, bnubulla kfung i tanà ulula, na mngel na mlanu ale, na manla,

‘Magakdo. Tay, magakdo i bong banwe ani,

du mdà di knunan

mbaling nun bong knun

i kdee dad mfun i dad kafal.

Kabay di là mlo, tatoo mlal malmo i kdee dad knunan.

20 Kabay gamu dad mnè di langit,

too gamu flehew di kalmo i bong banwe ani,

na gamu dad nfun Dwata, gamu dad to dek Dyisas Krayst, na

gamu dad tugad Dwata flehew gamu,

du tanukum Dwata i banwe ani na toon fanlayam, du balasan i dad

sasè mgimò di gamu di muna fa.’ ”

21 Kafnge én, teengu satu mtulus kasaligan Dwata na nketan i batu salngad kalbong i bong batu di gilingan, na i kagketan flesan bat ditù di lam i mahin, na manan,

“Gambet ani i kagakto kalmo

i bong banwe Babilon,

na talà lêman teen i syudad ani.

22 Na talà lêman linge di banwe ani i kakbit dad arfa,

na dad to mlingag, na dad to samlali, na dad to mféw.

Na balù tan kfulung i dad to,

talandè to mimò déén.

Na talà linge déén

uni i gilingan.

23 Na talà lêman teen di banwe ani kneng i salò.

Na talà lêman linge klehew

i dad lagi na dad libun falami sdeme.

Di muna fa i dad to gal fabli too ale mgafè di tah tanà.

Fagu di kagawam i dad to di banwe ani, tamafgaw dad to mdà di

kdee banwe.

24 Tatoo falmo Dwata i banwe Babilon,

du déén gumite i kfaloh i litè i dad tugad Dwata,

na dademe dad to nfun Dwata,

na balù i litè i kdee dademe dad to bnanò di tah tanà.”

Bong klehew di langit

19 ¹Na kafnge én, lêmangu linge i talù gambet talù i bong dee dad to stifun déén di langit, mkit ale, manla,

“Dnayenito Dwata.

Dnayenito kenen i falwà gito, too mdatah kenen, na too mtulus di kdee.

²I kukuman too glut na too matlu.

Tafanlayaman i libun mkat lagi,

du falmon i dad to di tah tanà fagu di too sasè knayè i lawehan.

Na tagbalas Dwata litè i dad saligan tafnati i libun ani.”

³Na mkit ale lêmán, manla,

“Dnayenito Dwata.

I buk mdà di ksakuf i banwe én tatì mbuk kel di landè sen.”

⁴Kafnge én, i lwe falò fat ulu di dad to faglut, na i fat gambet lmanaf i too mto, lkuad di muna Dwata, i sudeng di gusudeng i gumdatah, du mangamfù ale di kenen, na manla,

“Too glut sa. Dnayenito Dwata.”

⁵Na mdà di gusudeng i gumdatah nun talù, manan,

“Dnayenito Dwataito,

i kdeeyu dad lifanan,

gamu dad to mafè kenen,

dad to mdanà na dad to mdatah.”

⁶Na kafnge én, lêmangu linge i talù gambet talù i bong dee dad to, i unin gambet luk i bong fikong, na uni i bong kilet. Na lingegu i kitla, manla,

“Dnayenito Dwata.

Du Amuito Dwata Too Mtulus i magot i kdee.

⁷Na kdeeito flehew,

dnayenito na fdatahito kenen.

Du takel nan i bang kasdeme i Tingà Bilibili,

na tafatlagad i libun nwean.

⁸Na gablé di libun i klaweh too bukay,

i too mneng na too mlaneb na lsakan.”

Na i gumtatek i mabtas klaweh ani, dunan i kdee dad matlu nimò mgimò i dad to tanfun Dwata.

⁹Na man i kasaligan Dwata di deg, “Sulatam ani. ‘Too nun kafye di dad to nlak di kasdeme i Tingà Bilibili.’ ” Na lêmán manan di deg, “I mangu ani, too glut tnalù Dwata.”

¹⁰Kafnge én, lkuad agu di muna i kasaligan du fan agu mangamfù di kenen. Kabay balingan man di deg, “Nang ge mangamfù di deg, du alò agu salig Dwata gambet ge na dad flanekam tmulen i kaglut gablà di ku Dyisas. Alò Dwata gumangamfuam.”

I kaglut tagtulen gablà di ku Dyisas én sa i tafgadè di dad tugad Dwata.

I smakay di bukay kudà

¹¹Na kafnge én, teengu i langit malwa, na déén di munagu nun bukay kudà na i dagit i to smakay i kudà ani, dunan Gsalig na Glut, na too matlu i kukuman na keben i kasfati. ¹²I matan gambet i lifoh dminè, na di tah ulun nun dee kyangenan. Na nun dagit i gsulat di kenen, na kenen alò i gmadè dun. ¹³Na i klawehan taalam di litè, na i dagitan Tnalù Dwata. ¹⁴Na too dee sundalu di langit mlalò kenen, na lamsak ale i klaweh bukay na mlaneb, na smakay ale i dad kudà bukay. ¹⁵Na lamwà mdà di baan i too gamban sundang, du ani fisanan i dad to di sahal banwe. Na i kagotan dale landè gamfisan kenen. Nlék ale Dwata Too Mtulus gambet i kaflà bunge grép, du toon ale fanlayam, mdà di kaflabeen dale.

¹⁶Na nun dagit gsulat di klawehan na di fuadan, manan,
“Harì di kdee harì na Amu di kdee amu.”

¹⁷Na teengu satu kasaligan Dwata tadag ditù di duh, na falbongan i taluan, du tlon i kdee anuk mayeng ditù di tah, manan, “Salu gamu dini na stifun gamu, du nun bong fkaan Dwata gamu. ¹⁸I fkaanan gamu i ungad i dad harì, na i dad ulu di dad sundalu, na i dad sundalu, na i dad kudà na i dad smakay i kudà, na ungad i kdee dad to, balù dad to fasak ku demen ise fasak, na balù dad to mdanà ku demen mdatah to.”

¹⁹Kafnge én, lègu teen i bong kanlikò na teengu dad harì di tah tanà, na dad sundalula. Stifun ale du sanfatila i to smakay i kudà bukay na i dad sundalun. ²⁰Kabay baling gakkè i bong kanlikò na i tugad Satanas, dunan i gal mimò dad tnikeng gfaloh i bong kanlikò. Na fagu di dad gamtikeng ani tafangawan i dad to tagamdawat ilè i bong kanlikò na i gal mangamfù di kabawehan. Na i bong kanlikò na i tugad Satanas sdulè ale bat mto ditù di lanaw lifoh dminè sandawà. ²¹Na i dad sundalula mati ale fagu di sundang lamwà di bà i to smakay i kudà bukay. Na i kdee dad anuk di bnas, too ale fabsol kmaan dad ungad i dad to mati.

Mbakus Satanas mlibu fali

20 ¹Kafnge én, lèmangu teen satu kasaligan Dwata fdanà mdà di langit. Nagotan i kunsì i too mngalam sol landè gusenana na kitinan i bong sangkali. ²Na flesan kanfè i bong naga, dunan i busaw dnagit Satanas, i ulad di muna. Bnakusan kenen sangkali. Na mlibu fali klon laan galwà. ³Na batan Satanas ditù di lam i mngalam sol landè gusenana. Na tnakaban na knunsian na fkahan ilè déén, du fye landè fakay lamwa dun, na du fye là nan mgaw Satanas i dad to di dad sahal banwe kel di sikof i mlibu fali. Di kafnge mlibu fali, falwà kenen là mlo.

⁴Na lêmangu teen déén di langit i dad gusudeng i dad gumdatah, na i dad sudeng déén, i dad to tamablé glal mukum i dad to. Na teengu dad layef i dad to fnati mdà di kaglut tagtulenla gablà di ku Dyisas na ktulenla Tnalù Dwata. Là ale mangamfù di bong kanlikò ku demen di kabawehan, na là ale lmen dmawat i ilean di angasla ku demen di kmalla. Na lêman ale nték Dwata mdà di fatila na gagin ale ku Dyisas Krayst di kagotan klo mlibu fali. ⁵Ani sa i tnanin kték Dwata i dad to, bay i dademe dad to tamati, là ale fa mték silang kakubu mlibu fali. ⁶Too nun klehew na kafye i dad to gakuf di tnanin kték i dad to. Lehew ale du landè gagan i galwe fati di dale, dunan i kaflayam landè gusenana. Kabay mgimò ale dad bà di Dwata na di ku Krayst Dyisas na gagin ale di kagotan di lam i mlibu fali.

I kfisan Satanas

⁷Di kakubu i mlibu fali, ftaku Satanas mdà di sol gumakusla kenen.

⁸Kafnge én, mdà kenen na lanngaban i kdee dad sahal banwe di klamang banwe, du fangawan dad to. Na i dad sahal banwe ani, dnagit ku Gog na Magog. Santifunan dad to du fye sanfatila Dwata. Na là gse i kdeela du gambet falak di kilil i mahin. ⁹Na magu ale di klamang banwe na sanlibutla i gumnè i dad to Dwata di syudad i mabtasa di Dwata, dunan Dyérusalém. Kabay nun lifoh mdà di langit fdanà di dad to sasè, na mti ale sakuf.

¹⁰Na Satanas i busaw gal mgaw i dad to, bat kenen ditù di lanaw lifoh sanbool sandawà dminè, i tagumbat i bong kanlikò na i tugad Satanas. Na déén i gumaflayamla mduh na butang kel di landè sen.

I sangal kukum Dwata

¹¹Kafnge én, teengu i too bong gusudeng bukay na i gumdatah sudeng déén. Na i tanà na langit lana di muna Dwata na talà nan teen dun. ¹²Na teengu i kdee to tamati, dad mdatah na dad mdanà to, na tadag ale di muna i gumdatah, na nukaan i dad libru. Na i satu libru nukaan, dunan i gugsulat dagit i kdee dad to gamdawat nawa landè sen. Na i kdee dad to tadag déén nukuman mdà di kdee dad nimòla gsulat di dad libru. ¹³Na balù i dad tamati di mahin, na i kdee layef mdà di gumnè i dad mati dnagit Hadis, i kdeela nukum Dwata mdà di dad mgimòla klola mto di tah tanà.

¹⁴Kafnge én, i fati na Hadis gbat ditù di lanaw lifoh. Na i lanaw lifoh ani dunan i galwe fati.

¹⁵Na ku simto dagit i là gsulat di libru gugsulat i dagit dad to gamdawat nawa landè sen, tati ale bat ditù di lanaw lifoh.

I falami langit na falami tanà

21 ¹Kafnge én, di keyegu teengu i falami langit na i falami tanà, du i muna langit na muna tanà talana di mata, na talandè mahin. ²Na teengu i syudad nfun Dwata, i falami Dyérusalém, fdanà mdà di Dwata di langit. I kafye baweh i teengu gambet i satu libun sandeme takamlaweh i too fye baweh klaweh du tagatlagad smitong i yaanan. ³Na nun lingegu i bong talù mdà di gusudeng i gumdatah, manan, “Neyeyu, mdà ani mnè Dwata di saféd i dad ton. Na mnè kenen di dale na mgimoan ale dad ton, na kenen i mgimò Dwatala. ⁴Na nifun i kdee lwak di matala, na landè mati, landè mliidù, landè mngel, na landè katduk, du i dad muna takubu, na kdee matlas.”

⁵Kafnge én, i sudeng di gusudeng i gumdatah, manan, “Neyeyu ani, fnalamigu i kdee.” Na manan di deg, “Sulatam i kdee ani, du kdee tnalùgu too glut na too gsalig.” ⁶Na ani fa manan, “I kdee tagdohò nan. Agu gutambù i kdee na agu alò fakay mnge i kdee, agu tagnè mdà di kagatbuan kel ani, na kel di atuan landè gusengu. Na banlégu yéél dad to malinum, dunan i yéél mlé nawa landè sen na làgu fbayad dale. ⁷Na i dad to gamfisan i kdee sasè mkel di dale di klalòla deg, ale gamdawat i kdee kafye blégu dale. Na mbaling agu Dwatala, na ale mgimògu dad togu. ⁸Kabay i dad to likò mlalò deg na dad to kmagol i kafaglutla di deg, dad to mimò kdee bung sasè nimò, dad to manò, dad to mimen i sasè knayè i lawehla, dad to gal stulen di dad sasè tulus na mimò dad gamtikeng fagu di dale, i dad to mangamfù di dad ise glut dwata, i kdee dad to tmulen kéng, na kdee ani, maflayam ale di lanaw lifoh nbol sandawà dminè. Na ani i galwe fati.”

Falami Dyérusalém

⁹Kafnge én, salu di deg satu di dad fitu kasaligan Dwata tamagot i dad fitu tukung fnò i fitu sangal flayam. Na talù di deg, manan, “Salu ge dini na fiteta ge i libun sandeme, i fan nwè i Tingà Bilibili.” ¹⁰Na neben agu fagu di gnagan i Tulus Dwata ditù di tah i too mdatah bulul. Na fiten deg i syudad nfun Dwata, dunan i falami Dyérusalém fdanà mdà di langit mdà di Dwata. ¹¹Na too samlinang du mdà di bong kneng i kdatab Dwata. Samlinang gambet kneng i satu too mabtass batu dnagit dyasfér, na too mtuu knengan. ¹²Na nun bong labatan too mdatah, na nun sfalò lwe gufusukan, na sfalò lwe kasaligan Dwata munung di dad gufusukan. Na kat gufusuk nun gsulat déén i dagit i dad sfalò lwe bel Israél.

¹³Na di labat nun fat kililan, na kat i fat kililan nun tlu gufusuk. Gsen di gugsut i duh nun tlu gufusuk, na tlu gsen di gufdu i nus sabnal, na tlu gsen di gufdu i nus timul, na tlu gsen di gusdaf i duh. ¹⁴Nun sfalò lwe malbang batu gugafdak i bong labat ani. Na tagsulat di dad batu ani dagit i sfalò lwe dad to deki i Tingà Bilibili.

¹⁵Na i kasaligan Dwata i talù di deg nun neben btas blawen, du bantasan i syudad ani, na i dad gufusukan, na i bong labatan. ¹⁶Na i syudad ani salngad i ktahaan na i kabalan. Na bantasan i syudad na i ktahaan lwe libu fat latu kilumitru, na i kabalan na i kdatahan salngad. ¹⁷Na bantasan i bong labatan na i kdatahan nam falò mitru. Na btas i nagot i kasaligan salngad di gito btas.

¹⁸Na i labat mgimò mdà di satu mabtas batu mlunu dnagit dyasfér. Na i syudad mgimò mdà di glut blawen na too mtiu gambet i sfihu. ¹⁹Na di tah i dad batu gugtadag i labat nun dad sahal batu too mabtas. I tnanin batu fnalasila dunan dyasfér na mlunu batakan, i galwe batu dnagit safira na mlunu i batakan, i gatlu batu dnagit agata na dee sahal batakan, i gfat batu dnagit ésméralda, na batakan satu klunu, ²⁰i glime batu dnagit sardonik na batakan fulè, i gnam batu dnagit karnalina na batakan fulè, i gfitu batu dnagit krisolito na batakan mlalél, i gwalu batu dnagit birilo na batakan mlunu na mlalél, i gasyem batu dnagit tofasyo na batakan mlalél, i gasfalò batu dnagit krisofraso na batakan bukay, na i gasfalò satu batu dnagit hasinto na batakan fulè, na i gasfalò lwe batu dnagit amatista na batakan mlunu na fulè. ²¹Na i dad sfalò lwe gufusuk di syudad ani slame férlas. Na kat satu gufusuk nun satu malbang férlas. Na dalan i syudad Dwata ani slame blawen na too minal gambet i sfihu.

²²Na landè teengu i gumangamfù di Dwata di syudad én, du landè gukmamu dun, du déén Amuito Dwata Too Mtulus na Tingà Bilibili, na ale gumangamfù i kdee. ²³Na landè gukmamu i kneng i duh na i bulen di syudad én, du i tmuyal di syudad i bong kneng Dwata na i Tingà Bilibili kenen i salò. ²⁴Na i dad to mdà di sahal banwe magtuyal ale i knengan, na i dad harì di tah tanà, nebela i knunla salu ditù. ²⁵Na i dad gufusuk di syudad là tnakab di mduh na landè sa butang. ²⁶Na i dad mabtas kandeem na knun di dad banwe di tah tanà nebe di syudad. ²⁷Kabay landè sasè fakay gfusuk déén ku demen i dad to mimò i dad magagyà nimò demen tmulen kéng, là ale gfusuk. Alò fakay gfusuk i dad to tagsulat dagitla di libru i Tingà Bilibili i gusmulat dagit i kdee dad to gamfun nawa landè sen.

I yéél gamlé falami nawa

22 ¹Kafnge én, lêman nun fite kasaligan Dwata di deg, i satu yéél gamlé nawa landè sen di dad to. Too mtiu, na maloh mdà di gusudeng Dwata na i Tingà Bilibili. ²Na i dalan gumaloh yéél ani di gutngà i dalan i syudad. Na di sbalà kilil i yéél nun kayu gamlé falami nawa, na munge klit bulen, sfalò lwe dulé di sfali, na i doonan i bulung du fye mgulè i dad to di sahal banwe.

³Na i kdee knang Dwata landè déén. Kabay déén i gusudeng Dwata na i Tingà Bilibili di syudad ani. Na i dad salig Dwata mangamfù ale di

kenen. ⁴Na di bang én, teenla i baweh Dwata na i dagitan gsulat di angas i kat satu dale. ⁵Na di bang én, talandè kifu. Na landè gukmamu i salò ku demen kneng i duh, du Amuito Dwata mgimò salòla. Na i kagotla magin di Dwata kel di landè sen.

Tamdadong i kasfulê Dyisas Krayst

⁶Kafnge én, talù i kasaligan Dwata di deg, manan, “Too gsalig na glut i kdee dad tnalù ani. Na Amuito Dwata, i mlé i Tulusan di dad to tugadan di muna fa, dekan i kasaliganan ditù di dad saligan, du fye fiten i dad fan kel.”

⁷Na man Dyisas, “Fanlingeyu agu. Tamdadong i kasfulêgu. Na nun kafye di dad to mimen i gman kdee tnalù tagfite di libru ani.”

⁸Na agu Dyan, tamlinge na tamite i kdee ani. Na di kaklingegu na di kitegu i kdee ani, lkuad agu di muna i kasaligan Dwata, du fan agu mangamfù di kenen du fiten deg i kdee én. ⁹Kabay manan di deg, “Nang, nang ge mangamfù di deg, du alò agu satu salig Dwata salngad ge, na dad flanakam gambet i dad tugad Dwata, na kdee dad to mimen i gman di libru ani. Dwata alò gumangamfuam.”

¹⁰Na manan di deg, “Nangam buni i dad tagsulat di libru ani, du tamdadong i kagdohò i kdee ani. ¹¹Na ku tafan gdohò i kdee tagsulat di libru ani, i dad to tagnè mimò sasè, bayaam di kimòla sasè, na i dad to mimò i magagyà nimò, bayaam di kagagyà nimòla, na lêman i dad to tagnè mimò fye, bayaam di kimòla fye, na i dad to matlu nimò, bayaam di kimòla matlu.” ¹²Na man Dyisas, “Fanlingeyu agu. Tamdadong i kasfulêgu. Na nebegu i untung blégu di gamu, na blégu ani di kat satu to gasngad di dad mgimoan. ¹³Agu sa gutambù i kdee, na agu fakay mnge i kdee. Hae, agu tagnè mdà di kagatbuan na kel di landè sen.

¹⁴“Na nun kafye di dad to mfuk i klawehla, dunan dad to mlaneb mdà di dad salàla, du nun alella di bunge kayu gamlé falami nawa na fakay ale fusuk di gufusuk di syudad Dwata. ¹⁵Kabay di lwà i dad to mimò magagyà nimò, i dad to stulen di dad sasè tulus na mimò dad gamtikeng fagu di dale, i dad to mimen i sasè knayè i lawehla, i dad to manò, i dad to gal mangamfù di ku Satanas i busaw, na i dad to too mayè tmulen kéng. Kdee dad to ani là ale fakay gfusuk di syudad Dwata.”

¹⁶Na fadlug talù Dyisas, manan, “Agu sa Dyisas na tadekgu satu kasaligangu di gamu dad faglut di deg, du tmulen kenen i kdee ani fan gdohò. Agu sa i bel Harì Dabid. Na agu sa i blatik gal mneng smitong i lwa.”

¹⁷Na i Tulus Dwata na yaan i Tingà Bilibili, dunan dad to faglut di kenen, manla, “Salu gamu dini, gamu là faglut, na faglut gamu.” Na i kdee mlinge i mangu ani, fye ku manla, “Salu gamu dini, na faglut gamu.” Ku simto malinum, fye ku salu kenen dini, na balù simto mayè, fakay minum di yéél gamlé falami nawa, na landè bayadan dun.

I sangal talù Dyisas na Dyan

¹⁸Agu Dyan falagu faglabat di kdee mlinge i dad tnalù tagfite na gsulat di libru ani. Na ku simto tamnù di lam i libru ani, tnù Dwata di kenen i dad kaflayam tagsulat dini di libru ani. ¹⁹Na ku simto mwà i dad tnalù tagsulat di lam i libru ani, nwè Dwata alelan di bunge kayu gamlé falami nawa na alelan di syudad nfun Dwata tagsulat dini di libru ani. ²⁰Na Dyisas i tmulen i kaglut kdee sulatgu ani, manan, “Too glut, tamdadong i kasfulègu.”

Na agu Dyan, mangu, “Too glut ani. Amugu Dyisas, faflal ge samfulè.”

²¹Na kayègu Amuito Dyisas mlé kafye di kdeeyu dad to nfun Dwata. Amén.